

HUNGA

Text und Musik: Günter Auch

Merk'sch'n net den Hunga, dess Grimma in deim Bauch?
Sieh'sch`n net den Kumma, den rot-grie-geela Rauch?
Riech'sch se net die Menscha, mit ihra schwarz vakohlter Haut.
Schbier'sch net an de Luft, vum Tod den kalda Hauch?
Hör'sch'se net die Kinna, wie se schrill ihr Wehleid klag.
Glaab'sch net, dass in Windeseil, gonz blutich werd dein Kraga?
Friedenstruppe werra g'schickt, unn die gucka doch bloß zu,
wie u'barmherzige Kinnasoldada, morda ohne Ruh!

REFRAIN:

Raketa ab zum Himmel unn Feia uff jedes Haus! Varrecka soll die Menschheit,
Varrecke Katz un Maus. Sie locka mit da Freiheit, die koina richtich kennt.
Frolocka wonn im Oschda, da gonze Himml brennt.

Egal des vastimmelte Lewa, egal des vabrennte Land.
Egal die kreischende Seela, Parola an da Wand.
Egal die bluticha Fratza, egal dess schreiende Leid.
Egal die dreckige Leicha, wu bleibt die Menschlichkeit?
Wann Wolka Träna heila, wann Trauerweida trauara.
Wann Schadda stumm vaweila, wann's Meer still stehableibt.
Wann d`Fraua Stoina schmeißa, wann Haß die Menscha treibt,
Dann hocka se an ihrem Schreibdisch, un zähla was iwrich bleibt.

Sieh'sch se net die Alda, mit ihra stumm vaheilda Augga?
Fiehl'sch net wie die Mächtige ihre Knippel uff dich haugga?
Schmeck'sch net uf da Zung, den schale G'schmack vun denna Liega?
Wie se oi ums onnamol oifach net gnungg kriegga?
„Die“ baua doch die Waffa unn pflanza Hass ins Herz!
Vasteckle sich hinna Mauara, die fiehla selbst koin Schmerz!
Für Macht unn Geld do schicka se unnsa Kinna in de Dod!
Vakaafa ihra Seela unn werra niemols rot!